

Anche ché a la Casa Alpina,
ma sör sé, gh'è la dutrina;
la dutrina quat la Messa
i fà bé a ògne altessa.

Ma ciamémel «dutrìnel»,
l'è piö giöst e l'è piö bèl.
pò difati 'l Don Antòne
l'se dà mia del dotorone.

Cassadùr per ecelensa
l'ghe tègn pòc a l'eloquensa,
l'preferéss a l'elegansa,
come al ròcol, la sostansa.

L'parla semplice e modèst
col fà sèmpèr tat piö prèst
e, per fass capì del scèt,
a l'ispiega anche 'n dialèt.

Ma l'la dis con tat fervùr
la parola del Signùr,
che l'convince 'n d'ü momènt
qualunque l'sées l'argomènt.



ol dutrinel del don Antòne

Grancc e pìcoi i stà atènc
e i fà fröt d'insegnamènc.

Per tegnì ligàt ol tema,
a l'gh'à ön òter bèl sistema
(a l'la 'mbròia d'i olte apòsta),
chèl de fà bòta e risposta.

Quat l'è bù, tat l'è balòss
piö d'la èsta che l'gh'à'ndòss;
la piö part a l'völ sènt chèi
ch'i è piö svèrgoi, ocanèi,
senza fass tata marvèa
se l'è 'l mal de la famèa;
àanse, apunto l'zöga dèt
coi miserie de la zét,
desquarciàndoga 'l sò mal
a l'ghe tira la moràl
facia apòsta sö misüra,
la piö pratica, sicüra.

Gh'ò ün esèmpe ché a la mà
che l'm'à facc pò tat grignà
e ve l'cite per fenì,
cosé anche òter grignerì.

Ciamàt sö lé ü capo-banda
a l'ghe fà chèsta domanda:
— Atènt, fà mia 'l baciàcol,
quaél ol piö gran miràcol
che l'à face ol nòst Signür
per dimostràm ol sò amür? —
(lù l'intènd l'Eucarestia,
ma l'völ vèd indòe che l'ria).

Chèl iscèt, söbet ispinto
de la mòla de l'istinto,
a l'respónd, sigür del fat:
— Quando l'acqua l'à cambiàt
in bù vè 'n de damigiana
al banchèt de spósi, a Cana... —

'l Don Antóne l'isganassa:
— A te sfälset mia la rassa

— a l'ghe dis — siv töcc istèss,
no vedì che l'interèss...
Tò pàder che l'fà l'ostér
tel'insègna bé 'l mestér;
l'è 'l miràcol chèsto ché
che per vóter a l'và bé
e l'fiv sèmper zó 'n cantina,
ma col bastù, co la spina...
Basta, basta, sèntet zó!... —
E l'ghe bat la mà söl có.

Pò i mòneghe i grigna
al miràcol de 'sta... vigna,
ma sperém che lure 'l vè
i me l'daghe amò genüi.